

Scande ratem solers animis quam scandere iussit,
Qui freta, qui terras lucidaq; astra regit.
Tum remos manibus tenta quoq; prendere dextris,
Qui referant summi dogmata sancta Dei.
Et tua non rapidis pete carbasa tendere ventis,
Qui signent numen spiritus alme tuum.
Non iter impediant tibi sæua pericula ceptum,
Quæ venient, rapidas dum feret ara rates.
Nusquam tuta via est, terraq; mariq; frequentes
Instant, qui vitæ noxia damna ferant.
Est tibi dura fames toleranda, & turpis egestas,
Æstus, quæq; acri frigore gaudet hyems.
Cærulea nubiferis spumescunt æquora ventis,
Et quatiet laceram vasta procella ratem.
Ante tuos vultus stabit fera mortis imago,
Conspicies oculis Tartara nigra tuis.
Tunc etiam pellent ultra Garamantas & Indos,
Nubiferi puppem turba proterua Noti.
Hic tibi tum demum æquoreas mare flantibus Austris,
Producet facie versicolore feras.
Quæ nauim varijs tendent insultibus orbam
Carpere, & in vasto mergere vela sale.
Quid blandas referam Sirenes? quidue rapaces
Harpyias? quarum morsibus ictus eris.
Nec tu Scylleam rabiem, vastamq; Charybdim
Effugies, rapido quæ vorat ore rates.
At tu nil horum conspectu territus, audax
Ceruleum profugis puppibus æquor ara.